

晚晴移詩匯

晚晴移詩匯卷一百六十九目錄

王蔭祐 五首

梅寶璐 三首

張桐 二首

陳寅 四首

劉肇均 一首

董紹蘭 一首

商廷煥 二首

于昌壽 一首

莊元植 一首

孫顯 二首

姚承燕 二首

秦寶璣 二首

汪芑 五首

黃圖成 二首

王貞春 二首

徐宗亮 五首

許惠 三首

王映薇 一首

許斌 一首

李西堂 五首

陳世相 一首

羅執桓 一首

胡友蘭 六首

孫垓 四首

顧家樹 二首

沈守正 一首

葉德徵 一首

曹廉鏗 二首

吳德純 二首

郭肇 三首

宋澤元 二首

董葆琛 一首

金其恕 一首

吳忠誥 二首

曹駿良 一首

胡兆春 三首

李林芳 四首

陳戍 一首

凌紉 一首

匡南枝 三首

李謨 三首

蔣本璋 三首

徐楫 二首

冉崇文 一首

張品楨 一首

李紹宗 一首

張人鑑 一首

陸敘卿 一首

晚晴簃詩匯卷一百六十九

徐世昌

王蔭祐字子受正定人有覺華龕詩存

枯樹

浪說三株繞砌羅連枝傾頽感寒柯皴霜皮黯冬心在媚
雨條稀老幹多至竟成材關闕厯獨憐生意漸婆娑杜陵
詩句蘭成賦一例霜毫忍淚呵

讀史

高文侈美新何如赤伏符投閣乃不死咄咄莽大夫
東聘聯唇齒南征固腹心已成吞魏勢詎料大星沈
同是中朝彥奚分蜀洛爲不須更相競都在黨人碑
一出曲端死再出那瓊叛心學乃殺人符離四十萬

梅寶璐字小樹天津人諸生有聞妙香館詩存

題費宮人遺像

青史模糊碧血新千秋一劍氣彌綸同仇尙有秦良玉殺賊勤王到美人

貞心如鑑數難徵遺恨空憐太液凝應化西山萬峯雪寒光長照十三陵

久雨喜晴秋涼夜坐有懷

積雨兼旬喜乍晴碧天如洗透秋清杜陵託興詩多感宋玉增悲賦易成紅樹青山懷舊約蘂鑪經卷伴餘生故人消息飛鴻遠兀坐中宵對月明

張桐字筱琴天津人有秋園小詩

雨夜思家

咫尺成千里言歸竟未歸遣懷親筆視別夢繞庭闌早潦
天心見炎涼世事非曾經兵燹過况復遇年饑

詠雪

天公歲玉太息忙頃刻朱樓換粉妝終夜窈明如對月滿
庭花落不聞香煙沈野岸鴻泥淺雲鎖空山鶴夢涼此夕
烹茶添雅興一杯清味滌詩腸

陳寅字紫岫晚號鐵如武清人有蘭雪齋詩鈔

尹隱居鹽月亭

閒攜玉川椀來上尹公亭一水寂然碧萬山相對青詩心
留月鑒樵響隔雲聽澹極忘今古茶煙縈翠屏

辛巳重陽偕長彝亭少農過白雲觀早酌後獨游陶

然亭

偶出城闔訪上清黃花紅葉綸秋晴登高肯負重陽約縱
飲能消萬古情文譙幾年陪謝傅窮愁何計慰虞卿紛紛
眼底緇塵滿獨對滄浪想濯纓

客裏佳辰幾度過看花聊以慰蹉跎何嘗富貴中年逼已
覺飛騰後輩多秋水一方掩日月斜陽滿地槍關河孤亭
獨上腸堪斷戲馬呼鷹奈若何

溝壑行

暴雨下注湍飛山眾河上決濤連天五月六月苗稼殘干
頃萬頃溝壑寬民居蕩析屋不完釜突溼爛薪難然高田
浸巨蛙黽喧長阡風腥龍蛟蟠天災洊臻如豎纏洪流降
割同堯年我困青氈無一錢目擊道殣憂百煎入口尙難
安飽温千厦烏能庇飢寒蔽日不散雲冥頑朝來又見東

霞軒

劉肇均字伯洵獻縣人拔貢有櫻甯齋詩草

寄張孝達

之洞

愛君因意氣豈獨昵交親志略能匡世文章不救貧遙知
鞍馬上應念藥爐人欲寄無多語時危慎笑顰

董紹蘭字香谷漢軍旗人有叢菊軒吟草

秋棚

風裏枝條弱秋來雨露勻可憐曾折處應有未歸人鶯語
久岑寂蟬聲自苦辛誰家羌笛裏猶怨玉關春

商廷煥字明章漢軍旗人有味靈華館詩

寄懷鄭芝庭上舍

玉立仙才鄭子真王園曾與逐車塵懸弧尙記同庚子解

劍恆思訂甲寅競病每聯茅店雨尖又時煮蠶頭春西風
昨夜敲檐馬坐對黃花似故人

夏園晚坐

元蟬噪夕陽綠重柳成行有客當風坐空庭過雨涼日長
青史伴人靜白蓮香微露新眉月林間澹澹光

于昌壽初名紹謙字東臯號子卿江蘇華亭人諸生有
東臯草堂贍稟苦心集

趙忠毅公鐵如意歌

一枝青鐵霜華崑提攜四顧乾坤小在昔款署良工張至
今器重尙書趙尙書名共三君隆風骨錚錚與鐵同中宵
起舞一擊節千錘百鍊如其忠獨居深念意不樂天際雲
陰起霜鶚想當出手指揮時委鬼茄花定驚愕其如天不

祚明何鉤黨沈寃走荷戈風聲嗚嗚鬼神泣拂拭囊底增
悲歌一身萬里君門曠漢關竟絕生還望白骨埋處青山
香流傳此鐵未從葬公身已去公物存摩挲欲比鐘彝尊
光芒上矚寒星斗嶮強猶是憑忠魂吁嗟鐵兮爾何福名
傳千載爾餘複長尺四寸重二斤上鐫名字二十六

莊元植字叔侯震澤人諸生有澂觀齋詩

書齋

書齋客去倍蕭然坐對黃花瘦可憐一種荒涼誰畫得亂
鴉嘸破夕陽天

孫顯字勗三無錫人諸生有妙香居小草

花朝

空山生計太蕭條濁酒填胸氣不驕賸有殘書如舊雨那

堪佳節又花朝強扶游興穿松徑聊寄閒情劇藥苗解識
升沈隨大化將軍莫問霍嫖姚

人日

客裏逢人日蕭齋絕可憐雪消簷上雨冰隔渡頭船愁比
春還早宵來夢不全計尋方外去儒服誤多年

姚承燕字芑孫青浦人諸生有詩民漫詠

八月九日南郊閒步

出郭皆秋色尋途荻葦邊晚潮寒帶雨孤塔迴淩煙樵爨
荒榛闢犁鋤廢壘穿擬沽村店酒生計足漁佃

信見邊防固軍資必豫儲荒灘屯士馬遠海躡龍魚機仿
法郎造民疑巢燧居側聞消寇警寰宇運舟車

秦寶璣字潛叔一字姚臣金匱人有霜傑齋詩

過桃花塢

江湖放浪信全真，慟哭唐衢不可論。
一塢桃花又零落，曉風孤棹過齊門。

小石洞

雲扃終古閉，草色綠巖腰。
鳴鳥不知處，游蜂如見招。
洞天晴亦雨，花氣午猶潮。
小坐無僧話，茶香破寂寥。

汪芑字燕庭，吳縣人。諸生有茶磨山房詩集。

渡太湖口占

天連雲水盪胸開，自笑乘風破浪才。
七十二峯青不斷，片帆飛過太湖來。

訪潘大出郭晚眺

言尋邠老去，臨眺正蒼然。
樹遠疑浮水，山高不礙天。
漁榔

鳴浦急收蓬山村圓薄暮橋頭立平林半沒煙

池上小集

病起好酬雞黍約

巢隱病
姑初愈

崦西頭是屋東頭豆棚瓜架偏

宜雨柳陌菱塘易得秋鷗夢不離湖上棹蟬聲多傍夕陽樓市鶯輪與柴門迴無數溪山供卧游

度峙崦嶺至銅坑

漠漠雲陰二月天層岡復嶺俯平田杏花能白非關雨楊柳初黃不受煙幽境每從迷路得吟懷差喜入春妍湖山舊侶銷兵燹寥落晨星感昔年

題陳子跋孝廉

鈔

詩文集

劍氣珠光久鬱埋瑤華贈我眼驚開身全浩劫庸非福詩到名家始斂才趙壹飄零囊底罄杜陵辛苦賊中來故人

尙有王湯在好對湖山勸一杯

黃圖成字伯西江蘇甘泉人諸生有希陶軒詩鈔

詩話伯西無子及後其婿董玉書
爲編遺著詩多遭亂傷懷之作

夜坐

寂坐渾無賴天空黑氣沈殘
螢耿寒夜疏雨碎愁心懶與
書相接聊將酒半斟孤鴻雲
外響淒切感人深

舟返鹽瀆寄邗上諸子

還家八十日渾似客中游雁
序條離別驪歌空唱酬水天
三百里風雨一扁舟倚枕潮
聲急鄉心逐浪流

王貞春字煦堂句容人有僑隱集

越吟

東下錢江深復深渡江一舸
入山陰天台此去無多路流

水桃花未易尋

購得楊升菴先生雪韻樓畫像敬賦此詩

萬里君門遠投荒死未歸山花蠻女曲椎髻漢臣衣木落
愁猿嘯倉空宿鳥飢思親餘涕淚應逐白雲飛

徐宗亮字晦甫號某岑桐城人世襲騎都尉有善思齋

詩鈔

黃鶴樓望雨

黃鶴樓頭鶴不歸隔江雲氣挾山飛盤空急雨垂天下入
望長帆到岸稀水鳥帶煙投別樹風豚吹浪撼危磯道人
移榻西窗近愛聽江聲接臥幃

贈趙新齋秀才

年少方多病親衰更患貧長途憐作客生計苦依人有鶴

形同瘦如龍性未馴相逢悲握手添與淚痕新

晚過山寺看芍藥

丈室花光照暮天色香空盡轉生妍青山何處容吾隱看
到殘春又一年

洪山弔羅羅山布政兼感李迪庵舊帥

洪山一握征南節並世孤忠歎百身淮蔡專征誰繼志山
河憑弔各傷神多材自古傳三楚儒將當時更幾人寂寞
路旁祠廟在尙聞風雨泣遺民

夜飲示家人

閉門無事坐成晚正是冬深欲雪天樂趣恆妨兒輩覺酒
懷時愧古人賢紙窗燈火團圍夜茅屋松杉八九椽往事
淒涼堪憶否寒江短景望歸船

許惠字慧軒桐城人諸生有擇雅堂集

墩子湖

湖上荷花十萬枝夕陽如醉雨如絲
眾香國裏雙棲穩且爲鴛鴦立少時

板子磯

板子磯邊江水深青楓搖落氣蕭森
霜華暗染勞人鬢颯影孤懸獨客心
風定寺明煨芋火月斜港斷搗衣碓
浮生片刻清涼境試向中流鼓素琴

壽春孫氏東園題壁

更尋幽僻處秋氣澹斜暉
藤曲不堪杖荷枯誰製衣
跼蹐下上躡蝙蝠縱橫飛
予亦忘歸客悵然吟式微

王映薇字紫垣合肥人有自怡悅齋詩存

春雨夜坐

西風獵獵雨瀟瀟
冷焰無光夜寂寥
寸草報春心半死
殘桐入爨尾全焦
舊詩已狗秦灰劫
新鬼難憑楚些招
撫髀愁生推枕起
村醪味薄不能澆

許斌字芷江桐城人有藕濱詩集

嫩涼

嫩涼初試雨餘天
天際微雲意淡然
剛到秋風已蕭瑟
夕陽池館一聲蟬

李西堂字春池滋陽人諸生有晚悔堂詩集

秋日歷下晚詠

斜日冷殘照高城
欲暮天遠山寒映
郭湖水暗生煙慷慨
翻詩卷淒涼聽管竝
不須論出處客裏總堪憐

與莫午橋夢槐旋自江南至濟甯午橋北上占此話

別

握手話途窮乾坤飲泣中飢寒千里共辛苦兩人同愁說
君游北行看我欲東悠悠驅馬去悵望暮雲空

九日登少陵臺

木落西風雁叫哀黃花滿地獨登臺古人何往名猶在佳
節無端我又來把酒欣逢陶令醉吟詩轉憶少陵才憑高
幾度欄頻倚寂寞斜陽冷碧苔

雨後湖上

湖上東風雨乍晴湖中畫舫亂歌聲七橋柳色青搖水千
佛山光綠上城名士今猶傳歷下尙書終是怨燕京不堪
往事重懷古步向滄浪聽濯纓

秋日村居

荒村樹老破籬斜，就裏炊煙住幾家。
一夜西風涼過雨，朝來開徧豆棚花。

陳世相字輔堂號少航信陽人諸生有小茗山房詩草
山行

千山如拱立邀我快攀躋，路險人蹤少。
峯高暮色低，水聲懸峭壁巖影落深溪。
小鳥窺子至，驚飛夕照西。

羅執桓字樹公鄭州人諸生有蘂琴軒詩

夢中作

買得扁舟便是家，一竿一網寄生涯。
晚來獨醉西風裏，卧看芙蓉兩岸花。

胡友蘭字馨谷廬陵人諸生有蓼蟲集

詩話馨谷幼貧棄書業農既又去爲木工然不廢吟
詠其兄友梅雪村勸之讀乃得爲博士弟子員終不
遇而卒詩質雅傳永雖處窮約
又遭寇亂而無抑塞不自得語

山行

晚煙一抹鎖前峯秋老丹楓帶醉容
隔嶺不知何處寺西風送出數聲鐘

已酉重陽後一日送家兄赴永豐時予亦重有楚南
之行別後感賦

昨日同登窻今朝竟離別萍梗無定蹤
中腸九迴結執手臨前浦欲語聲不發
翻恨長江水爲我助嗚咽
秋風偏無情遠送片帆去頃刻舟不見
兩槳隔雲樹含愁獨自歸一步一回顧
秋江今夜月扁舟泊何處

獨行有感

蕭條古道少人過一徑涼風動薜蘿黃葉下時秋色老亂
山高處夕陽多半生寥落英雄淚萬里飄零游子歌漸覺
年來霜滿鬢客中歲月又蹉跎

鄉思

窗外蕭蕭響孤燈淡五更鄉思如碧草一夜雨中生

陪家兄游石屋巖

一石結爲山山空鬼斧劈曠然啟豁衍堂廡淨如拭脈脈
泉溜清肅肅雲氣逼巖穴漏天光虛白生四壁何人偏多
事仙佛重裝飾紛紛羅拜勤香煙不暫息祇爲求福來誰
賞境幽僻勝地俗所溷應爲山靈惜我兄饒閒情邀我著
游屐洞外霜葉紅洞中莓苔碧小坐布楸枰衣袂嵐翠滴
一局猶未終夕陽已西匿

孫垓字子九號少樓會稽人諸生有退宜堂詩集

詩話子九於道光時嘗與祥符周素人叔子季旻
季暨同郡周雪甌王孟調李蕤客陳珊士結言社月
舉詩酒之會迭主齊盟咸同間又與吳江王眉叔同
郡陶仲義子衛文沖兄弟結臬社兩社中人皆以次
取科第有達者不亦惜他涂登仕版獨子久屢
試不第甌窮无悶其詩亦夷然淡遠肖其爲人

晚過雞鳴寺

落日疲驢踏薛行雞籠山接古臺城門前遠翠千層而屋
後湖光一片明寸寸地荒皆古跡迢迢風起作寒聲游人
過此多淒感況際蕭寥客思生

癸亥元旦

白髮蒼顏五十三韶華回首更何堪中年逢亂垂垂老瑣
事都親漸漸諳暝日鼠姑舒葉嫩春江魚婢佐餐甘歲朝
禮佛無多祝願遂山居一覺酣

寄內

析桂炊珠頗不貲，衰年累爾苦支持。
我家乞米尋常事，十萬飢軍待餉時。

讀曾文正公集

挑鐙對編簡，仰止德愔愔。
學術祛成見，勳名出小心。
論文官燭地，籌筆陣雲深。
允矣讀書法，千秋佩士林。

顧家樹字介卿，會稽人有介卿遺草。

塞上曲

銜枚度磧夜生寒，鐵甲霜明北斗闌。
邊馬遠馳天未曉，提刀直欲靖樓蘭。

秋日偕伯兄步鄆西郊外

雁影動高秋，飛雲澹不收。
相將問征羽，何日到南州。
淺水

波瀾感暮山煙霧稠天風吹百感淒絕此淹留

沈守正字莊士號小樓仁和人諸生有不遠復齋集

高郵道中

濃淡雲容頃刻非雨絲絲裏日光微黏天鬢社湖中水坐
看風帆葉葉飛

偶成

望裏平林高復低征車兀兀走長隄楊花似欲留人住亂
向東風裏馬蹏

葉德微字西楣號又樵錢塘人有香雪庵吟藁

村居卽事

遠岫平林小板橋江鄉僻處謝塵囂風侵譚氏村前樹月
落孫家渡口潮兩岸荻蘆秋瑟瑟一羣鳧雁夜蕭蕭漁鏡

明滅沙洲外，翦笠樓蓑勝黑貂。

曹廉鏐字菊辰一字掬澄嘉善人貢生有雙橋草堂詩
橐

與杏林談禪作禪語贈之

聽人說真諦言下頗了了然求上乘禪莫若無言好有時
笑口開我亦不自曉持定無無想此身亦可少

汾源雜詩

道是山城卻水鄉小橋略約足徜徉柳陰深處垂綸坐釣
得游鱗二寸長

吳德純字雪溪歸安人有聽蟬書屋詩錄

春日至上土橋過任處士莊

放眼郊原闊清幽愛郭西垂楊藏野店春水漲前溪興愜

忘途遠情歡，恨日低穿林。行幾曲，遙指是高樓。

修竹圍茅舍，鳥聲喜客來。居鄉憐野逸，煮酒樂追陪。子秀書能讀，童癡釣未回。殷勤重惜別，遠寺暮鐘催。

郭肇字懷初，一字復亭，諸暨人。諸生有東埭詩鈔。

詩話：譚復堂作東埭生，傳稱其詩文皆有家法。集中詩多避亂時作，雖憂時傷亂，而無嗾殺之音。

別沈素庭

大雅久不作，風塵吾所憐。相思隔秋水，一別暗遙天。海上瑤琴感，人間寶劍篇。漫游成底事，秦望正蒼然。

剡溪道中

時清乏勝游，世亂輒高舉。晨興理清策，匍匐忘溽暑。剡中山水區，鍾毓自太古。探奇興偶逢，出險意自許。連峯有送迎，累時具仰俯。熊虎對踞蹲，龍鸞各騫舞。神工貴伏藏，到

此氣盡吐度嶺坡陀遮迴溪磬响聚細路夾松篁振袂驚
飛雨行行出木杪下視見衡宇夕霏起遙薄回首忽無覩
林荒虎氣遙谷遠風力阻緬彼巢居子願言託啟處方壺
不可卽日暮獨延佇

憶吉竹山房兼懷金氏諸舊好

巖卉林筵望不分四山並作翠氤氳臨溪盡日常疑雨閉
戶一身猶帶雲新筍香時惟縱酒好鶯曉後又離羣年來
頻作還家夢更爲還家苦憶君

宋澤元字瀛士浙江山陰人有懺花盒詩鈔

軍中曲

將軍飲美酒紅爐錦繡圍士卒棲靄幕寒霜擁鐵衣鐵衣
相對淚如雨眼前哀樂是誰主將軍二十便封侯那識人

間征戰苦

絡緯

夜色闌珊月上遲半窗花影弄參差
鏡前絡緯聲聲急似爲愁人織鬢絲

董葆琛字獻臣號嘯蘭慈谿人諸生有學易堂詩稟

雁門童子歌

童子山西代州人姓馮氏名福基年十四侍父天堂寨巡檢任咸豐七年夏賊掠天堂被虜入黃梅境宿藥店童子竊毒藥餌死賊十七人而自仰其餘藥瀕死賊棄之野一僧攜

之去忽稱蘇作書贈其家投筆而絕其父臚其事徵詩

古來奇跡那有此有此奇跡出童子不能刃賊亦殺賊一
十七賊同時死童子隨宦居天堂倉卒賊勢來披猖盡掠
孩提驅以走日暮同次黃梅鄉飛龍藥店暫安宿一兒無
言眾兒哭卻喜羣賊無我虞逡巡謀賊進鳩毒鳩毒一中

羣賊誅眾兒相向猶躊躇此身自願無生理亦仰餘藥捐
其軀淒涼野寺江村畔欲絕未絕神不換手作家書貽家
人其志已畢魂乃斷我聞此事心暗悲五尺之童才智奇
自古無獨卻有偶千載以上童汪錡

金其恕字養齋嘉善人諸生有倚雲樓古今體詩

倚樓

木葉蕭蕭下西風人倚樓親朋隔生死身世感沈浮日落
千家暮天高一雁秋烽煙猶不息憑弔古今愁

吳忠誥字子猷浙江石門人有遂思堂詩存

歲暮寄懷家兄子定臨汝舍弟子益洪都

南服地氣煥十月霜始見漫漫雲色殊槭槭風響變池水
收浩渺庭柯改蔥蒨宵征哀蟋蟀來賓感鴻雁繁華憶春

陽周素迫歲晏索居易永久屢見時物換客游何所樂况
乃非仕宦言誦鳴鳩詩離憂取申旦

中且不能寢念我同氣人飄泊各異縣邈若胡與秦百年
復幾何一別三四春山川隔言笑寤寐見精神禽困羅
繼奮飛道無因多憂捐心志易與衰暮鄰懷哉保顏色堂
上有老親

老親年六旬素髮垂兩耳筋力已非昔痾疾漸叢起三時
缺溫清百念交懼喜負米徒遠游豈盡奉甘旨况念先世
來潛德久未啟顯揚匪異人凌替責難諉詩書篤遺訓家
聲庶有身相期各努力黽勉自今始

曹駿良字馴夫嘉善人貢生有紫蕙山房詩鈔

仲夏久雨初霽

到枕不成寐連宵雨更風曉煙籠半郭新霽慰三農庭蘚
濃含翠池荷溼暈紅高槐蟬始噤逸韻響晴空

胡兆春字東谷漢陽人有尊聞堂詩集

旅懷

誰爲蒼生起蒼生望竟虛未諳桑孔術空上賈鼂書人重
白頭豕余憐賴尾魚無田歸亦得頻問故山廬

水鳥

萬物各有託所居雲水鄉不隨曉鳥逐祇爲得魚忙風影
落孤艇波聲上夕陽白鷗自高潔獨立避漁莊

閉關

嶺上白雲自往還扶筇久立印苔斑憐渠作賦終投閣笑
我無錢欲買山阮籍何嘗真善醉安仁可惜不能閒頭顱

如此宜休去松徑蕭疏日閉關

李林芳字蘭畦嘉魚人諸生有養真山人遺草

東津灣

先賢問津處

畢竟津何處滔滔水自東狂瀾誰砥柱失路幾英雄世已沈淪
候人遺車馬中古今同一轍不必怨途窮

徐道元廬墓吟

涼風撼樹走輕稊霜枝夜夜唳烏鵲千秋遺恨幾皋魚我思古人今不作觀山徐元人中豪頽波滾滾能插腳場室三載苦羈棲誰與伴者陶公鶴哀感地祇上升聞帝諭觀火須洞若炎官喇旨來墓田火繖高撐勢煜爍茅茨散作劫灰飛元身翼主淚珠落頭額可焦膚可灼赤子之心鐵堪嚼帝曰汝孝宜汝嘉三日卽瘳可勿藥精誠耿耿格彼

蒼孝根天性豈外鑠唱余失怙守望廬三載視融兩脰脯
朔雪壓廬顛反風此事追憶猶如昨得毋有主相冥漠令
我對此滋慚怍葛藟縣縣枝條弱海上岫石空填雀如君
元精貫湯鏹坐火不死死亦樂祇今尙餘炮烙癩舉似刳
股舊痕無隔膜

築隄

潮退鼓聲謔潮來鼓聲靡一鼓遏洪流鼓衰潮益駛我家
江南湄卑溼那足齒力田四十年秋成未一紀汨漚乃其
常不涇特偶耳今夏勢更惡大工方未已蛟鱷戀舊鄉仍
欲窟其裏一躍水倒流再躍濤四起畚鍤勤萬夫不供一
掉尾野老泣向天帝闔安可啟歸視索逋人絡繹如流水

夢亡友彭可人樹坊

後死蓬飄甚人間劇可哀多君存友誼一夕渡江來妻子
勞薪米干戈逼草萊廿年艱苦事知不到泉臺

陳戍字左卿善化人有歸樸堂詩存

六月十日偕竹虛過芥孫

近喜蛟螭迹已潛

今歲苦雨數月至此始息

相將訪舊不辭炎嘔心詩

囊探懷出娛目圖書信手拈盡日清談臨水檻有時散步
立風檐閒中分得幽人趣點綴煙雲上筆尖

凌朝字翼雲善化人有焚餘詩草

望君山

長鯨吞不得愛此一拳青巨浸還終古孤根衛百靈江深
風雨冷秋老杜蘅馨欲駕龍羆往題詩卅六亭

匡南枝字子庾祁陽人諸生有愛梧堂詩鈔

游陽山庵贈宋禪師

猶記祇園九日游
寒山落葉幾經秋
慚儂十載徒烏帽
輸汝一庵到白頭
貝葉飄殘來去劫
天花散盡古今愁
虎溪自此宜聯社
爲愛高人惠遠儔

游陽山庵次韻答李大

曾從春裏踏殘紅
剝啄禪關一笛風
茶味恰添鐘梵後
詩情遙在水聲中
百年鶴徑老松樹
三月鶯花古佛宮
臘有蒼涼數行字
擬參半偈萬緣空

七里灘阻風

一棹麋城下
風高浪拍天
灘頭千舫避
沙尾萬舟懸
餘靄浮孤鳥
殘陽曳暮蟬
滄江虹貫月
誰問米家船

李謨字禹臣善化人有壽梅山房詩存

奉母還長沙暮泊城外親友枉問話至夜分慨然有

賦

五日零丁離虎穴一家生死此漁舟已拌異地理詩骨竟
有驚魂出逆流兵火餘生成駭鹿江湖何處著閒鷗嚴城
永夜催歌哭刁斗聲聲無限愁

鄉關已近意還驚五月危舟泊岸輕六十衰親歸故國一
彎新月冷孤城卻憐弟妹嘗辛苦久累親朋卜死生百里
煙塵竦長夜艱難何以慰深情

得湯臣弟書

小別又三月鄉心慘不舒可憐五十日纔得一封書喪亂
思同氣艱難况索居烽煙方未已生理復何如

蔣本璋字少甫湘鄉人有少甫遺詩

漢口

江漢交流處寒潮瀉碧空
龍鼉驕跋浪雁鶩飽乘風
遶樹含煙綠危檣挂日紅
一聲長笛晚嵐氣正濛濛

婁妃墓

紂用婦言亡甯王竟反是
夜夜婁妃魂哀哀怨江水
墓門秋風起颯颯響空林
似鼓湘靈瑟悽愴裏餘音

徐楫字秋湄成都籍建德人
諸生有澹宜草

秋日謁賈閩仙墓

讀徧殘碑禍憑高坐石欄
山空秋氣肅亭古日光寒
碧酒招魂易黃金鑄像難
九原風月夜雅調向誰彈

老馬

鼓鼙聲久斷疆場伏櫪何顏對
紫纒一願幾經逢伯樂千

金無復遇燕王會隨射虎嘶邊月且共疲驢卧夕陽漫詡
識途爲絕詣蘅雲終竟逐飛黃

冉崇文字右之酉陽人諸生有二酉山房詩鈔

和秦樂山九日登高原韻

萬里橋南我舊游琳宮梵宇足清幽寒鴉幾點道旁樹清
磬一聲江上樓訪古先從碑碣認醉歸偶爲管絃留惟餘
一事慚佳節七度都逢託麩秋

張品楨字肖廬南海人諸生有清修閣稟

朱磨伯日先生少孤貧力學尙氣節能文章予最愛其論說以謂本其所見使得以藉手必有大過人者惜乎其以青矜老也

讀白樂天詩書後

細玩樂天詩情眞語自摯雖乏建安骨要具風人致顏謝

窮幽深雕刻非所志陶公本性真臭味原無二縱非李杜
匹雅可張一幟昌黎逞雄肆所就各殊異長吉苦嘔心奚
如此樂易微之夙並馳恐或難聯轡中倫與中慮逸情常
遠寄時似天籟鳴願盼饒嫵媚不必闕奇險切切含鼓吹
胸懷凜冰清吐屬絕塵累如以佛法論騷壇大自在高吟
賀雨篇孰是音可闕

李紹宗字子迪賀縣人有不求聞達齋詩鈔

游石壁頭廣福庵

約伴清游上翠微參天石壁隱禪扉高吟人在千山上長
嘯聲從萬壑歸怪石奇應疑虎踞蒼松老欲化龍飛旁人
共指高僧墓蘭茝春來碧四圍

張人鑑字鏡蓉貴筑人有鈞珊遺草

詩話鏡蓉負神童名下筆好作奇賦
語年止十有九較昌谷更不如矣

詠史

鴻門宴罷約鴻溝成敗機關誤項劉百二河山秦苑火八
千子弟楚人羞干戈赤縣驅亡鹿冠蓋烏江葬沐猴聞到
拔山歌一曲淒淒垓下水東流

陸敘卿字少葵蘭谿人諸生

憶劍歌效昌谷體

靜吸西江斟北斗鞭鸞笕鳳星辰走足躡蓬萊頂上行孤
柱擎天憑隻手金人奉劍凌波迎玉女投壺含笑久王母
晨參青鳥翔馮夷晝舞靈鼉吼騎鯨捉月吞入腹絳官長
使銀蟾守左揮神犀截一角右拂奇鶴墮九首網得珠淵
五色蚪恢恢游刃當筵剖湘妃鼓瑟蕩拊琴如山麟脯如

河酒娶妻不必陰麗華
獨對嫦娥作佳偶
高宴崑崙擲渾
花三百玉龍償博負

晚晴移詩匯卷一百六十九終

晚晴錄詩匯卷一百七十目錄

世續一首

鄭文焯十六首

丁立誠三首

易順鼎四十七首

黎汝謙一首

陳書二十一首

徐世勳二首

何家琪四首

陳作霖十二首

蔣萼二首

蔣師軾九首

朱貽泰一首

張仁黼八首

顧璜二首

高賡恩四首

龐鴻文三首

黃澱之 一首

陶銳三首

聞福增 一首

葛之覃 一首

劉曾駮 三首

晚晴移詩匯卷一百七十

徐世昌

世續字伯軒滿洲旗人光緒乙亥舉人官至文華殿大

學士諡文端

詩話文端保直最久熟於禁中故事會遭國變憂悴以終詩不經見閱延子澄遺逸清音集得一絕句錄之如見其人

定靜堂秋雨

綠槐庭院最清寥小卧詩牀俗韻消
淅淅聲喧驚午夢隔窗冷雨打芭蕉

鄭文焯字叔問一字小坡漢軍旗人光緒乙亥舉人官

內閣中書有大鶴山人詩集

詩話叔問爲蘭坡中丞瑛棨少子世擅鑒藏承其家學羣精經籍故訓工於書畫旁通羣藝晚尤以詞得

名所著瘦碧冷紅比竹餘音若雅諸集刪定爲樵風
樂府近代詞流特稱精詣詩多答吳中作情辭麗逸
不失雅音

園居早春寄山中客

林鳥春多聲池花落還見連情美瞻聽逐物矜芳衍盛往
識來希娛新增舊眷佳人處帷屏高製絕雕絢碧雲殊未
期瑤華獨誰薦歡怨隔歲年宿心違繾綣載在黃鶴篇感
音發哀斷夕思初月盈晨憂繁星散良游信乖絕念子長
粲粲鳴彈答幽素擷馨託柔翰及時徵昔言山阿遂嘉踐

寄幼蘭兄潮州

秋館奄夕陰近霜桂始華晚秀有新妍勝賞無世譁附物
徇時美切情寄幽遐渚鴻違北栖江魚泳南嘉嶺表遲高
聞吳趨獨哀哇苒苒年事別茗茗旅望賒念予同懷睽興

言行役嗟

秋思引

秋風嘯谷驚蒼松水簾懸雨千尺淙壞衣老僧罷晨梵空
山落葉聞霜鐘颯然萬籟忽岑寂孤鶴叫破青芙蓉山虛
水深白雲遠岵嶢亂石無人蹤古來此意誰復會新聲慘
亮爭蟬蛩起拂朱絃三歎息世無稽蔡吾何從

九日泛舟楓橋

雲鱗疊空生麴波酒中倒卧秋山螺蛾眉小綠破雙萼醉
把茱萸勸殘酌蘭風吹寒歌扇薄水枕夢回怨萍泊吳飲
未終楓葉落二十五聲秋點索

白雁歌

江城霜信初聞鴻昨日登高來北風菰蘆蕭蕭野水闊瀟

湘天盡秋雲空蘭釵小婦夜幽苦殘月樓中絃自語盛年
孤豔空閉幃玉顏不及南飛羽近聞湖海增繖多高飛冥
冥愁奈何長林喬枝不可擇笑看燕雀紛投羅

字鹿謠

光緒己丑秋吳郡大雨田間積潦數尺歲將
大無九月廿六日復聞雷吳南宋吳諺有云

秋字鹿損萬斛蓋

田家五行占也

秋孛鹿損萬斛東畦種禾西畦菽禾頭生耳菽生蠟城中
穰草干錢束孛鹿謠哀嗷嗷昨日湖水平南壕鵝鴨集廬
魚升橋出無航居無茅荒荒飢色近在郊四鄉那不愁漂
搖鄰災况聞江有蛟

秋霖行

老農昨入城爲言道光季淫雨晝成晦野漚船入肆傾畦
連吟水沒人廬游鵝鴨田生鱗強梁白梃走簷下官符到

鄉還捉民吳儂樂歲無餘業年災一值如赤貧公中豈無
歲時蓄南倉北倉雀噪困昨聞詔卹寬租欠計歲行恩到
鄉縣誰憐下戶尾畢逋不輸官府輪胥掾今年秋霖積田
水視昔潦年差尺半天時人事不可知今朝雨雹昨雷電
我聞此語心怱怱隱几恍見波濤高坐使愁心戀江海武
陵漁者儻可招

聞雁

秋水渺無極愁心送白雲西風何太急北客獨先聞旅夢
蒼煙寺樵歌黃葉墳江南匙矰繳雨夜尙呼羣

讀高陶堂志微錄書後

夢落滄流此輟絃一官滯調偏殘年振奇文字投珠晦垂
老功名誤瓦全甯惜清流論黨局從教才思傲頑仙荒荒

西曜湛歸翼虛傍柴桑卜墓田

舊婉

舊婉前華脈脈思疏風間雨閣蘭期湖山夢冷成詩瘦絃
管聲繁易酒悲襟上唾花空有恨尊前梅柳爲誰姿柔腸
苦被明眸割徹骨風流鬢已絲

壬老將去吳感贈長句

霜信初丹晚桂林閉門秋思已深深冥鴻遙帶瀟湘雨樊
鶴猶餘江海心雲物空濛迴北望詩歌浩蕩發南音不辭
更醉重陽酒別後蘭芷漫獨吟

元墓山樓重見舊題

空寒煙月五湖灣經歲看花數往還片石誰堪同日語高
雲終是在山間十年西崦虛仙籍幾度東風破醉顏欲采

青芝微舊夢

青芝山在石壁東北梅花最深處

樵風長識鄭家山

楊柳

秋盡江干柳未黃
官亭相送只斜陽
漢南何意先搖落
枉及東風作絮狂

綠塵帳殿晚陰移
舞袖飄零怨楚姬
莫把長條贈歧路
故宮猶得妬腰支

靈巖

日暮誰聞小海歌
胥屏東望五湖波
無多故國青山在
枉費宮眉十斛螺

夜雨有憶

花外疏疏暗雨過
西園明日綠陰多
故人不寄瀟湘夢
一夜春魂泣女蘿

丁立誠字修甫錢塘人光緒乙亥舉人官內閣中書有

小槐移吟藁

詩話錢塘丁氏富於藏書竹舟松生兄弟歸書文閣世豔稱之修甫爲竹舟猶子濡染家風精目錄版本之學詩亦以考校擅長

角花箋歌

金花半角玉版方曾沐純廟題奎章浙江疆臣拜手獻楮
先生侍南書房是時遭際重臺閣徵士聯吟盡鴻博吾杭
杭厲本鄉親如鳳之翎麟之角百四十年時不同流落燕
臺花市中世情莫歎薄如此幸有同聲片楮通我昔相遇
琉璃廠短幅長箋兩心賞攜歸同社贈新詩首唱鐵花老
詞長先生先世尤可詳晉有蠶繭唐硬黃百金不許市一
紙江南供奉澄心堂碧雲春樹好顏色紅染桃花豔芳澤

終古家聲重洛陽
白州刺史高華職
有明繁盛宣德年
遠族更有側理箋
二林家寶不敢祕
亦拜天家賜錦鮮
先生之風無瑕淨
老去紅顏花掩映
願花常好楮國春
我尙依依桑梓敬
清平四海萬千秋
來助人修五鳳樓
新翻花樣馬一角
快寫吉語羊千頭

孫仁甫文炳奎出觀先世所藏溫公澄泥硯李延平有題名南宋爲魏鶴山得見真西山跋明有文衡山觀款

南唐澄泥第一品
北宋黨碑第一人
匪硯之重世自不敢輕
況其溫溫玉質娟娟出水蓮
丰神硯之方正見公德
硯之圭角表公節
公兮硯兮皆可述
獨樂園中說周易
墨花濡染傳家集
鳳唼龍尾伯仲間
只許橋亭謝升堂
玉帶文

入室前有觀者李延平後有觀者文徵明其中更有西山
鶴山來同盟八百載後歸之樂安孫可與宋雕資治通鑑
稱爲兩足尊

君家藏宋刻通鑑
劫後尙存殘本

元妙觀石畫搨本

墨雲四壁石畫張玉了又展東書堂坐論文物六朝古晉
太元迄隋開皇是時苻堅敗淝水安石賭墅殊清狂林邑
範佛貢方物金盤戴首珠騰光長星一杯勸汝酒昌明讖
符晉不綱蟲沙猿鶴化異類繞樹烏鵲悲流亡楊花落盡
李花放東海鯉魚雲中翔憑闌默坐者誰子知音或爲萬
寶常以古爲鑑痛爭戰刻石垂戒昭文章昔我征車濟甯
駐石室畫象搜武梁郭巨朱鮪墓題彫龜池李頌誇禎祥
何若射陽謁尼聖問禮雁贄周道旁金石圖史左右列襄

陽一舸游金閫金閫元妙古道觀爲五都市百戲場
響搗蟬翼薄瓊玖珍貺投錢郎廉石鬱林訪學舍劍池虎
阜摹山岡縱有題字歲月近媚俗書畫開文唐

易順鼎字實甫一字中實龍陽人光緒乙亥舉人歷官
廣東欽廉道有琴志樓集

詩話實甫童年奇慧世以懷麓目之早負詩名足迹
幾徧天下所至成集隨地署名合編爲琴志樓集詩
體屢變中以廬山詩爲最勝張文襄雅賞之曾加評
點四魂以後日趨恢詭雖以務爲工對雜用俚言爲
世譏訶而才筆縱橫自是健者
方諸舒鐵雲王仲瞿殆相伯仲

入廬山

名山別經歲見面恆苦疏重尋意已欣況有嘉客俱二州
連荆揚三宿異舟車鶯塵背江郭翼睇凌霄隅靈象紛在
眼造化爲之樞層陰漏雲日倏矚光景殊仙人騎白龍游

戲於空虛峰峰各生煙不辨誰香爐天風入澗籟萬竅酣
笙竽靈雨木末來蕭颺滿人裾豈敢怨霑溼田歌歡有餘
余亦自怡悅茲游清可書

濂溪墓

元公祠下望不見蓮花峰指點讀書處白雲生幾重斷碑
村豎畫高冢縣官封一樹霜皮老還疑欲化龍

雨中山行

連山塞鴻濛萬秀爭一雨杳冥陰陽中青蒼割吳楚長飆
吹元雲散此鴉外縷村偏行人稀草木接太古耐葉搖天
聲怪石挾溪怒百霆與千雷暝鬪林壑語喧笑雜蛙黽跬
步窘蛟虎淒籟孤襟寒溼路一縷取佳游雖愉快僮僕已
勞苦身穿雲根幽回首迷處所

山村雨夜送羅二還南昌

入門避雨屋打頭困眠一榻鄰豬牛雨腳遮簷萬山黑荒
村四月寒如秋瓦鐙在壁坐搖影兀兀欲照分襟愁范陳
對宇阻泥潦一街似隔干神州通家卅載未相遇遇君武
昌今兩度相攜肝膽入名山豈意山中送君去別夢宵沈
廬阜雲愁心曉挂章門樹淵明慧遠不可逢高人去後惟
青峰昨宵與君連榻處三生同聽東林鐘憐君病齒歸思
劇試飲寒泉銷內熱二輪風火足爲災六鑿根塵皆是賊
知君淨業持已深一心頗似維摩詰養和學道與天游他
日見君當玉色

兩行至通遠驛

蛟龍徙窟穴平地生湫淵奔湍挾勁弩倒射千山穿元雲

正朋興飛雨宙合懸下踏不測谿上戴有漏天行與雷電
鬪萬足莫敢前霑塗蔽四體耳目玩已偏愧聞叱犢聲力
盡壠上田一飽庶可冀前村有炊煙

雨霽隘口山行

雲根吹陰晴日腳遞隱見欲持并州刀翦取絲雨斷風翻
萬葉背霧走千峰面靈嶽猶混茫初煙與爲冠誰能埽氛
霾復此東南觀天開崖嶂古愁破嵐霞絢僕夫指前谿石
瀨已可亂雜花飄空林客眼誤霜霰詎惜泥霑衣徘徊爲
芳瓣

青玉峽龍潭

蒼崖天一圍徑轉吐雄瀑靈山孕眞源金膏出其腹奔雲
從空來數里勢屢曲意嫌鴻濛隘未肯受迫束化工惜元

氣萬古與之蓄跌爲孤潭幽神物有起伏紆徐向平川餘
響夏寒玉誰云一泓窘百寶可沐浴倒穿大瀛底日月入
亦綠地深雲霞幽自暮抵朝旭如聞清猿嘯下飲澗水淥
茲區實琴德幽接軒與頊遂令遺世士無言轉溫肅鐫痕
洗春苔萬石盡可讀我游豈云多終老難饜足綿暖天地
心清寥在奇服

歸宗寺看月

碧空無雲雨所洗長風舒波一萬里大月入戶天蒼涼幽
人攬衣坐驚起孤光遠映金輪峰喚取空山生海水是時
孟夏甫過望太陰未覺虧全體老蟾飛鏡入匡廬驪龍吐
珠出彭蠡一片愁心天地青半空島色星辰綺法宮鐘鼓
宵沈沈雄壓天聲萬山趾長廊可飯數百僧濁酒相呼二

三子夜深人稀聲籟絕犬吠蟲吟清可喜諸天寂寂守龍
象下界紛紛鬪牛蟻諸僧鼾睡了不聞佛亦無言垂兩耳
繞庭千徧看未足更欲開門覓山鬼愁入天邊壞塔孤夢
飛海外神州幾吾聞世界本漚浮何況人身一稊米百年
易盡如風鐙聚散死生皆偶爾要持屢劫妙明心一學昭
文絕成毀君知今夕是何年佛在虛堂正彈指

噴雪亭瀑

驚雷破山龍衙衙數里已聞飛瀑譁隔山兩重可望見猶
被青嶂微相遮連岡疊嶺起又伏其徑屈曲常山蛇先聞
絕境早神往一旦得路如奔麕適逢絕壁梯磴險以手代
足相鉤爬滿山石鏡亦可悅日光照耀瑩丹霞三步回看
五步坐遠衙鄱嶺明金沙力窮足繭瀑始出兩谷跌斷中

給訝觀龍垂胡各叫絕乃歎述者言非夸泣珠恍探泉容
窟織綃疑入鮫人家細如煙紉襲霧縠危若冰柱轉雪車
何年共工陷鼇極海水傾向東南斜九州天驚雨腳逗袖
手頗復哀神媧青霄倒垂星宿海客欲往泛愁無槎力穿
深潭九地破對足或抵歐羅巴橫飛水氣百步外色有騰
綠兼頰赧淒寒驚成滿肌粟奇幻疑是雙眼花石梁界空
何代造我意未較天台差其旁獨樹張大蓋太古冰霰融
根芽得非神葆茁五葉否則奇卉開三桮小僮相從頗解
事支鑪煮瀑烹新茶爆似天龍下聽講我如剪坐圍袞袞
更從石屋訪遺迹殘甑壞蘚空盤蝸土有山林往不返問
名與氏知誰耶吾儕疏懶本天放晚殉一壑非窮奢奔騰
不歸少至老人海一墮終無涯誅茅枕流願莫遂相對惟

有長咨嗟

萬杉寺五爪樟

萬杉化去無一杉惟有寺前老樟在樟分五體同一本身
歷百齡更千載旁達澗壑根已深直干霄空氣不餒雲垂
太陰逗雷霆風翻白日動光彩危柯半入煙冥冥細葉還
鋪雪皦皦化人偉奇丈六身猛士雄健尺八骸全張數爪
鱗之而俯視衆木身傀儡古來賢豪誰撫摩其人已往不
相待惟有五老之奇峰共對青天無倦怠雖言乾坤要支
拄未免得罪庸與猥下穿已愁傷地媪上拏又恐妨真宰
獨立無友大哉警衆人皆忌甚矣殆自是刀斧莫能入皮
堅有類披鐵鎧大材詎肯腐山林神物猶思避殖醢吾聞
豫章生七年便可與龍鬪滄海何況此樹世希有壽過凡

樟逾百倍願爲樓船擊西夷知君九死終不悔

還琴志樓山居贈陳大范二羅二

昔行萬里登峩眉雪山挂眼窮坤維神州積氣不可辨俯
視下界心魂悲周郎陸弟共攜手看雲聽瀑貪恢奇一別
名山跡如埽夢飛不度天彭道同游數子各風煙此意蒼
茫令人老前年投劾去大梁塵土凝面鬚眉黃不須物憎
早自廢逕欲往詣無何鄉尙憐匡廬在人境手翦萊棘開
山堂昨依帥府客武昌時復走入崔嵬藏宗雷陶謝豈並
世令我望古神慘傷自分山中侶麋鹿豈期世外同衣裳
陳兄高竒范兄偉羅弟思心偏斐疊攬珮褰裾無舊新願
我癡愚猶我躋俱懷逸興干煙霄共走窮山觸蛇虺彌空
際宙心期在未覺乾坤委荒隘萬壑天風咎笑聲干林海

月窺襟帶憐余鬢髮久蒼浪提挈雄肝聊一快默數歡游
已得雙休驚壯齒難成再龍藏麟見聖無權一壑悠悠自
可專我悟支離爲道本君知擁腫得身全酒乾燭燼無言
說五老同忘旦暮年

棲賢澗石歌

棲賢澗谷有奇石倒卧青冥神所擘鼇背驚翻海水飛龍
髯陡接天雲立奔霆日夜搖撼之萬古空山皆霹靂跌勢
紛如矢墜空涓流巧作珠穿隙其旁清穩百盤陀倚澗臨
流可敷席水石相遭豈不平自從天籟發噲呬道人兩耳
癡聾久問是水鳴還石鳴試撫孤琴動山響方知水石兩
無聲

范二賦琴志樓詩並寄由甫感其相愛作此答之

走昔萬事不挂眼黃金散盡千無憂西躡我眉眺雪嶺東
登秦岱觀瀛洲途窮日暮一掉頭匡廬來弄松風秋不能
專城且專壑有此木末三閒樓阿父懸車不出戶板輿自
奉安仁母杜陵弟妹黔婁妻相攜共入雲深處屏風宴坐
百重霞布水經行四時雨此福差堪做世人全家冰雪清
忘暑名山重到忽經春舊雨陳侯君雨新憶弟每看三峽
月思親常對五峯雲君家門外浮天水門內三龍頭腹尾
樓船過汝不相聞握手神州幾千里兩家兄弟感天末嗟
我與君皆仲子我兄已歿十九年惟餘我弟私相憐知君
三人亦共命夢飛海色迷吳燕山樓十日共歡譁闌干坐
懶巖花落屐齒干峰異笑噉酒杯萬古同哀樂君言龍眠
山水幽意擬移家住灕霍後者三茅前二匡他年姓氏都

成嶽

第六泉四絕句後二首憶南皮師義甯丈

太古雲漿滴似珠神功豈止滌羶腴軍持汲後猿窺影留
待他時碧海枯

靈樹道溉得天全那要供渠蟹眼煎誤識人間老桑苧幾
回封寄九江船

金山錫谷細評量風味端宜老贊皇四海一瓶休袖手更
持北斗酌天漿

火宅驚看烈燄時誰將清露灑楊枝人天一勺皆功德漫
惜驪龍領下髭

三峽澗連理松歌

張公所佩雙神龍何年飛入匡廬峰化爲奇峰號雙劍復

化山中連理松元氣爲漿相灌溉欲呼五老論年輩冰雪
常含太古心雲雷自轉諸天蓋託根磊砢幽澗邊聽瀑看
雲忘歲年澗聲萬古入其腹清籟時時還一宣荆蠻采藥
蒼茫意伯仲同行因讓季後來高節又夷齊掉頭不肯稱
周帝匡君亦是傷心人同氣相攜爭避世對松惆悵想干
春若見當時好兄弟我從前年辭大梁織畚傭春攜孟光
偶來並立此松下習習微風吹鬢涼白首同歸約異日青
山信美眞吾鄉至今有此數椽屋爲感此松幽意長萬物
從來有龍螭名材且莫憎巖壑吾輩還期共死生世人那
得知哀樂正直終蒙造化扶孤高亦受神明託請誦山中
招隱篇海水天風一時作

偕伯嚴雲錦亭夜坐有懷梁節庵去夏同游

去年六月雨汗揮君來款我山中扉飯顆我如子美瘦肉
山君似文潛肥遽借陳子褰裳返頗懾炎官張繖威溪亭
今日對陳子磅礴思君學解衣

山中觀物雜詠

細草昨爭碧疏荷今弄青微波想鷗鷺永夜亂蛙螢明歲
花應放何時葉可聽憑闌吾對汝幽絕兩忘形

種荷

淵失女猿久千錢新贖歸莫嘯深峽樹防溼定僧衣籠檻
刑應免山林事已非主人蔬果儉恐爾亦難肥

猿

一尺仙人掌殘魂詎自嗟榮華儕蟪蛄斷爛委蟲沙大化
原無朕微生共有涯支離吾欲懣截臂問三車

仙人掌已斷

寒蝶不能去相依認作仙映燈飄雨坐窺客枕書眠栩栩
寰中夢沈沈檻外天荒山銷彩翅知否惜華年

蝶

百草不成腐流螢何遽多
隔關吹不度當澗墜如何微物
關秋氣空山映晚醜誰持白日照仙魅在巖阿螢火

山僧強解事爲我慕陶公
學種先生柳安知晉代風
客嘲應不免吾意故難同
且祝清陰長他時酒盞中
新種五柳

張知縣鳳岡相訪贈詩走筆答和

衆生何癡愚造物眞狡獪
投其所嗜好相誘令破戒
世間耳目玩山水尤稱最
此癖尙未除難游天地外
應知種種相卽是種種礙
昔年官君鄉面目自憎怪
牽絲塵土中若逐傀儡賽
衣冠強束縛四體無一快
嵩岳與太行徒勞夢魂挂
自知蝮鶴性雅不宜軒蓋
浩然入匡廬藉了名山債
泉石可枕漱妻子相負戴
誅茅依甘棠亦得勿翦拜
至今屋數椽留作樵牧話
豈期山亭幽得與君晤
對足音破空

谷高詠喧奇艱行當布霖雨沾潤吳楚界變化猶神龍勿效鄙夫介

和伯嚴留題

鼻功德圃

空山杳無人幽花吾媚汝九州欲貽誰莫折一枝去

青松社

天地何清夷我歌君和之大雪閉舉壤將子儻能來

粥飯寮

人生何營營百年事此腹慚愧山中人一月飯幾熟

飛虹梁

偉哉祖龍鞭能叱鼉鼉起我醉亦跨虹遊戲四海水

鼉磯

龍伯與任公三千六百鈞鼈乎勿吞餌恐被五老笑

藏舟壑

藏山尙可負何況藏此舟願乘六氣辨元化以爲桴

和范二雨登琴志樓

細雨濛濛似玉京仙人咳唾接孤清雲浮車蓋簷邊色浪
鼓樓船檻底聲自倚煙霄飛酒盞欲回江海入簾旌朱弦
何處成連撫五老蒼茫喻此情

和范二題雲錦亭

淥水蜿蜒虹影動搖襟邊冷籟散亭舉諸天鬢色吹神雨一
壑琴聲送海濤仙夢影飄林外蝶酒杯痕溼檻前鼈飛龍
石瀨愁俱迴忍和幽人廿五騷

游棲賢寺

山響溪所爲兼以雨鳴葉鬢外如已秋涼痕在雙頰犖确
石磴古客步履蹀躞林隨大壑轉徑與奔湍接澄潭綠涵
空俯視戲魚妾玉淵阻磐陀草際成暗涉棲賢昔雄刹佛
力久疲芥寺門虛無人寒此松萬鬣嘒樹驚早蟬依花感
遲蝶殘僧三兩輩爲我啟箱篋畫圖天人師龍象猶震聳
更傾頻伽瓶舍利髮可貼想見毛孔中四大海水擣試觀
起滅雲旋失屏風疊幻幻眞亦幻屢劫同一髮冥思觸悲
悟廣殿風獵獵卻尋前路歸衝泥溼幽屨

游卧龍岡訪朱子築庵處用朱子韻

老龍卧垂涎成此千丈湫力能沛甘霖絡繹金簡投過時
若無用委棄荒山陬神功不求試又豈畏人求我來訪靈
境山路阻且修雙崖呀然開始見風雲幽太古鐵色壁倒

挂三峽流偉哉造化奇神鬼莫能謀哲人愜茲區卜宅嘗
屢游願名緬英賢溟漠神相酬至今尋丈間名與天地留
吾聞龍爲德出則被五洲退藏一壑內有若枯枝樛吾儕
但飽噉望古真堪愁徘徊日將暮煙靄何紛紛回首望蒼
崖寂寞飛龍秋

謝王使君送匡山紫芝

匡山紫芝生絕嘯神物難致路幽遠樵人辛苦媚使君持
獻公堂纔一本無德不能致此芝惟有使君能致之殊祥
異瑞不自私似可齋祓陳天墀誰知使君用意別聊贈山
中麋鹿姿紫雲一朵忽飛下滿堂動色相嗟咨真形輪園
根屈曲古色斑駁光陸離軒羲日月所沐浴姚姒雨露所
溉滋中含元氣猶淋漓旁觀但訝形模奇有如肅穆陳鼎

月明集卷之二
三
彝竒古又若岫嶠碑若鴛鸞鳳駢龍螭羽葆幢節紛追隨
真人無言坐華蓋王母欲下來金支僮奴不解天然貴疑
是巧工雕鏤爲使君懷抱何浩浩鬢眉頗似商山皓愷悌
君子神所保報之玉樹兼瑤草此芝亦是君精神一莖草
現金剛身十年種徧匡山春卻把餘春贈與人吾家先世
玉芝堂人去堂空芝亦荒拜君嘉惠不敢忘如還舊物增
休祥歸奉二親進一觴回首屏風南斗旁

琴志樓詩

峩峩山高洋洋水深雜花照淵幽柯蔽林目送萬化手勞
孤斟危亭若笠中有一琴
峩峩高山洋洋流水壑想藏舟巖思避雨太虛無垠人浮
其裏欲登高邱以望遠海

高山峩峩流水洋洋躬耕百年奉我高堂左列圖書右侍
姬姜寄形區中若存若亡

流水洋洋高山峩峩八表非遠一雲能多攀我叢桂贈之
疏麻何以相娛彈琴酒歌

送南康王使君解官歸里

王嘗爲會
文正治餉

使君十載南康城撫摩一郡如孩嬰我來匡山狎猿鶴滿
耳聞頌神君聲作公部民差可喜一廬穩受千崖裏勞公
白衣常送酒念我黃冠似歸里命駕每從千里外卜居已
過三年矣去年武昌來聞公亦初還公還舊郡我還山山
中猿鶴皆歡顏今年武昌來聞公又將去公還故鄉我流
寓山中猿鶴皆悲緒我今年纔三十強懷抱冰雪無春陽
每逢熱官輒走避見公豈意溫中腸公年八十好神采健

若龍馬馳康莊至人養和馭造化外物冰炭誰能傷乃知
蓬蒿與松柏相見未可論短長八百縱難企彭祖九十已
足凌張蒼何況治郡有陰德于公子孫行更昌官閣沈沈
語忘倦白頭回憶江南戰酒酣耳熱說曾侯幕府英英盛
羣彥郭冲五事猶能記阮孚三語初爲掾同時得路俱騰
驥鐘鼎山林兩無算轉餉曾推蕭相功飲醇自學曹參辦
寥落東南一老守頭童齒豁看雲久方今吏道頗衰微莫
使賢人厭升斗安得皆如元道州一時布列神州九解組
誰明陶令心埋輪更惜張綱手我尙思攀車上轅公言且
酌杯中酒函樓老子六十餘挂冠七載神豐腴今年有意
探匡廬乘興一訪茅君居華陽句曲公鄉里洞天福地非
虛誣煩公更作東道主卻寫交游兩世圖

雲霧茶歌

匡山雲霧窟沈沈聞有六朝僧未死窟中產作雲霧茶灝
氣清英復無比託根高接南斗旁坐令澗壑流芬芳三十
六梯不可到天風細細吹旗槍幽香似酒忘年歲僊蝶飛
來心已醉清閩宜教虎豹守窈冥若見龍蛇避鴻荒闢後
留根芟卻是匡君手自栽高空日月贈精髓邃古冰霜成
異胎斡旋元氣仙人掌斟酌靈漿衆帝臺蒙頂上清足相
埒宜供大祀陳天階辛苦山僧摘盈甕手輒足爾人閒送
葉葉都含瀑水溼枝枝盡帶嵐霞重種少應知造物怪摘
多莫使山靈痛螺春龍井徒芳腴尙書道此清涼殊中洽
精鑿贊皇李雙井佳題玉局蘇袖裏攜將雲霧去欲傾江
漢試跳珠

登五老峰觀三疊泉卽送陳范羅三君別

天風怒挾樓船走一夜吹人傍南斗琴志樓頭飛雨懸日
呼五老同杯酒詰朝海色連屏風初陽燦爛金芙蓉白雲
散盡五峰出一朵芙蓉爲一峰雲霞精魂日月液鑄此空
中數拳碧斑駁疑經女媧鍊崢嶸想見靈胡孽孤根下插
溟渤深倒湧奇雲作潮汐上窺造化無四鄰橫絕東南惟
一石不知混沌未分前此峰卻倚何天立乾坤崩坼海水
翻未倒鴻濛舊牆壁杞人莫憂天柱傾乾坤賴此還清貞
陽開陰闔苞萬靈砒然吐出如新硎大鵬沸海孽金翅孔
雀搖天翻翠屏江湖下通地道白吳楚中斷天門青獨斟
元樞執大象坐覽八極神明庭我疑一峰肖一嶽五嶽何
處藏真形鳥道橫空一萬里石梁捲盡崑崙水龍憤雷霆

鬪穴驕猿驚冰雪噴崖起鬢邊河漢似西流腳底須彌欲
東徙誤道天公大笑聲投壺玉女輸驍矢仙魅行霄瀑作
梯虹霓飲澗山如綺匡君無言李白死落落人寰初至此
未許殘飈冷劍花肯讓幽箔埋屐齒醉倚磐陀釣海還神
州正拂長竿底酒盡千峰休悵然與君便可挾飛仙青天
涕唾六龍背白日歌呼五老顛君卧太虛猶衽席我憑倒
景作闌干夢魂不逐斜陽去相與提攜十萬年

海會寺

中峰如法王師子據其右老僧初開堂辛苦此結構欲令
震旦國舉首眺靈鷲天高龍象雄地迴猿鳥瘦鐘鼓連風
濤樓臺出雲岫我來訪五老逮此成三宿沈沈青蓮地可
踏不可激禪人數十輩梵誦宵達晝爲喜觀威儀頻來聽

經呪彌天左蠡浸收取作階雷風帆散萬葉沙鳥飄干豆
禪心止水定客面觀河陂聞僧昔面壁絕粒坐巖齋今年
八十餘爽健神所祐其徒勇寫經堅苦本師授周身萬毛
孔一孔一鍼漏華嚴幾萬字一字一血透吾聞兼愛術不
惜頂與脰儒家好批根所見無乃囿孔墨何斷斷仰窺大
圓覆

重五前一日出山作

四年此地兩重五前度入山今出山荆楚歲時徒袞袞匡
廬雲物自閒閒每逢令節渾無奈欲買扁舟且未還回首
樓臺淹日月惟餘涕淚照苔斑

亡兒家錢庚寅重五
同在山中及三載矣

吳章嶺出廬山是李白別內處

長飈吹散五峰雲化作羣龍到東海我亦乘風下九江青

天府視樓船在寰中冰炭煮日月物外滄桑幻煙靄吳章
嶺上看雲還夕陽明滅千萬山誰倚山堂映酒看鏡邊五
老回朱顏半角樓臺自朝暮夢飛不到闌干殷忽驚腳踏
天梯古李白精魂在何許當日綢繆爲別離人生跬步多
歧路贈此悲酸千載心涕淚因風灑吳楚玉杖西還黃鶴
樓瀟湘南去更悠悠明朝回首一千里瀑布殘陽天際流
黎汝謙字受生遵義人光緒乙亥舉人官日本橫濱領
事廣東候補知府有夷牢溪廬詩鈔

過平彝所

忽墮南滇月四圓蠻花犴鳥劇堪憐恰纔去國一千里已
勝投荒十九年勵治正羞張趙酷安危未信孔桑賢平生
結習狂游在北固西湖訂夙緣

陳書字伯初晚號木庵侯官人光緒乙亥舉人官博野

知縣有木庵居士詩

詩話木庵雅才曠抱詩近白蘇於襲美魯望山谷後
山放翁諸家皆有神契晚於詩律尤細繼筆爲之格
嚴氣肆其詩云樂天有何好有意禪能言真造此境
善說杜詩凡人人熟讀而莫得真詮者一語拈出聞
者解頤生有至性居家待母疾無意仕進母歿乃出
游蘇皖年六十有二始以謁選得官值庚子匪亂所
治博野匪以好官不忍擾民賴以安後
二年因病乞歸卒於里弟衍爲志其墓

毀庵招游聽雨齋未果用昌黎炭谷湫祠堂韻寄題

先生游物外賤子困塵寰水聲常激激穿我枕函間夢中
從之游起來仍閉關暘谷闕太陽居山不見山東南石鼓
轟一缺如留環下窺洞地底窅縱窮天慳禹功茂以售皇
然念神奸危坐鄙禪悅辟易山僧頑不祈炭谷雨坐弄白
日閒行廚進雜沓所闕惟妍鬢山鬼導客至拙豪貌孱顏

何詩孫

畫圖 松嵐下拂拂落紙無由還我昔見二圖開幽憚前

艱蘿篠施歲蕤野英垂朱殷常呼鵲巢守肯使魚鑰鰈詩
料付葉適清便富難刪我曾盡讀之何止窺豹斑美哉東
野龍停雲思追攀人生少壯懷倏忽頭已頽誰能羨勤王
鄭師猶在營

肖韓貽詩兼送叔伊之行又次韻紀夢請幼點村居
依韻奉答

果能詩神交幽訪以夢到涉江淨澄思語俊失鮑照山樓
赴吟集苦澀臂難掉不嘲飯顆瘦幸恕酒戶小吾髯非絕
倫只可詫便了蒼黃持斧柯播弄對目巧合觀五七字怵
舞歎且笑昔時酩酊游接籬花下倒今來送家弟紫荆迹
如掃高軒或見過傾耳雞樹噪

曉起思家作書用東坡百步洪韻寄仲叔二弟

津亭東望生風波，隕陽西下無停梭。
幾回思歸歸不得，日手短墨窗中磨。
偶逐閒游訪水利，六井塞斷亡東坡。
涼風八月兼夜至，一洗花港稀留荷。
句留爲此直無益，願戀豈復緣黎渦。
平生出門罕窮獨，豪氣畫壁歌黃河。
此行有若隨嫁媵，詩識恰應烏投羅。
三楹樓下鼠窺殞，夜見漆色黃。
成駝嚴官之途始，畏絕縮足退食甘。
委蛇著書未半忽昏卧，仰見梁燕先辭窠。
起來繞屋喚傭僕，立意作達徵亡何。
蒼苔泠泠秋雨下，不飲恐被少陵呵。

寄芸敏京師

北雁不來秋雨稀，湖雲銜日游人歸。
軒牕卧愁詩又瘦，稻梁晚熟螿難肥。
去年花黃蝴蝶飛，登堂別君觴交揮。
討書

製序石林至丰采映壁如雲翬我今不樂辭庭闈君復流
連淹帝畿僧房獨榻亦何有垂橐勿怨緇沾衣春來襍被
還相依西山日落煙霏霏驂鸞夜靜呼靈妃詩成且復忘
朝飢人生何處更稱意看取滄桑日夜非

呈攷庵

元祐諸公天人姿慶厯聖德天所毗既清海甸卷懷已不
殫厥錫焉施爲鄉黨流風要人紀文獻晻昧煩探披泉虛
石佇蓋可負况詠華黍賡參差青春登朝強仕歸猿鶴權
喜迎龍夔摩崖浯溪興不衰老於文學今其誰温良顏色
入座有時以句法相質疑龍章鳳姿愛鼈跛亂頭粗服參
旄麓東屯西瀼隔還往歲四五至窮昏曦坐公聽水之齋
思松篁琴筑彈流澌山輦踏月夜半至挾卷報道詩尋醫

小除夕

海棠能作檐下花，梅葉先占舊年綠。吾廬春尚不欺人，到眼風光如轉燭。去年還家萬事足，豈料今年脫牀褥。悠悠往事不堪思，鼎鼎征裝宜結束。習勤運甓吾豈敢，獨立庭前驅雀浴。

本意

蜜蜂無花祇趁人，春融灩灩天光新。庭階燕坐聽鳥語，何用身世愁無垠。官廚生菜源源至，天意可轉哀吾民。尺澤何妨旬日勻，官身既老甯思莚。但喜子婦能和親，此豈分外天無嗔。

寸晷

晴日暫可惜，杪春行復闌。童心如有託，老境足能安。小室

淨洒掃古詩知肺肝百年長役役寸晷獨磬磬

三月八日自正陽登舟晚宿喬家渡口

髡柳饒生意沿淮似送行別懷思事遣老境轉身輕出處
何心決窾隆此念平維舟天色早料理舊詩情

滄海

滄海忘家在青春斷客過高華無燕壘邊僻有蜂窠勢在
風箏響資衰石臼科飢來持不托端未損吟哦

叔伊將歸上海

聚已無端別可疑春燈對案費尋思賞詩逕爾論千載浪
迹行將挾二彌鄧尉相須情欲動皖公未到意先疲看雲
自是平生慣病臂無眠奈此時

示墩谷

東下雖垂非纂纂花前屢舞更僂僂豈嘗老我愁何遜頗
爲旁人笑泰顛卧酒頻移花近榻忍寒還聽坐專氈句成
自取挑鐙看不似誠齋定不然

枕上

涼颼穿帳夜眞良巷出居人語未央客思移鐙轉深窅蟲
聲在壁極微茫河星漸淡月知上瓶水初冰花弄香開著
西窗蘇病息不應遽喚黑甜鄉

歸計將成怯情轉甚

極望山梁振羽翰巢林棲舍意難安三年城郭迷華表再
過園林冷食單出口暄寒愁問答刺心慰藉甚嘲嫻支離
骨態新來倍饒與旁人注目看

病卧抒思

吳楚相望老弟兄家林仲子獨孤行信知聚散期前定止
博艱虞練後生燕壘春寒忘近社雁程霄迴戀殘更已拌
斷絕吟哦事本色還緣小病萌

題淮雨集

淮雨聲聲歲又闌兒嬉造物太無端讀書種斷真堪惜慰
友詞窮有至難他日水沈憶西閣一時元髮殉南冠懷王
覺寤嗟何及豈信興亡屬子蘭

除夕用東坡常州夜宿韻

不飲何因得酒悲鄉心於我直幾微非緣兒女能相慰正
恐田園未算歸老去論兵空氣壯悶來發難亦知稀脩蛇
赴壑年年事南斗而今止暫依

零雨東山豈我徂許多柳雪尙征涂祭詩此夜新爲客爆

竹何妨辟畫符寫意頻添古商陸爭新惟鬪白髭鬚誰知
酒渴思逃席多謝殷勤爲點酥

與叟庵夜談

貪涼初夜垂簾坐新月辭人早上樓斜漢漸中秋指顧空
階如掃露沈浮咫尺聞乍愛貞元士癖好誰甄雅故流落與
閒中商句法定交京兆馬籠頭

讀溫岐詩感事

明月揚州屬狹邪太牢猶省惜才華飛卿流落樊川貴宮
體居然爲杏花

聽水居士貽詩畫扇卽次其絕句天字韻

詩沾滄趣益道然畫貌龍身與榻懸想叩巖扃了無分蹉
過百八暮鐘天

徐世勳字藻涵號釣叟震澤人光緒乙亥舉人官鎮江

教授有楓江漁唱刪存

詩話藻涵言學詩已晚以高達夫自况年將七十錄彙刪訂詩致清約無塗澤之習

寄費安槎

垂虹

吳江橋名

歸去已無家席帽飄零水一涯歲歲依人春燕

子年年入夢故園花耐寒和靖詩應瘦卧病相如賦不華
遙想故人當此日定搜險韻鬪尖叉

冬至日約湯伯繁游觀音山風雨不果

避俗約游山一勺清泉冷蠟屐已安排風雨忽交併卧聽
淋浪聲寒鐙澹孤影膠膠荒雞鳴懷人發深省

何家琪字吟秋號天根封邱人光緒乙亥舉人歷官汝甯教授有天根詩鈔

讀顧亭林先生書感而有作

寸心天萬世六合清明開風雲積時代日月相往來地維
隆西北萬里山橫排中突一華起渾抱洪濛胎河水昆侖
頂畢氣吞江淮方海司出納全脈爲之回土不遇三代賢
愚齊塵埃反望古制復假手凡庸才清時召不起老病完
形骸冬青屢相識夜哭臣麻鞮淒淒春雨苑獵獵秋風臺
匹馬倦天下著書空餘哀

浣花草堂

草堂歲月猶開寶萬里旌旗落眼前何川丈夫身許國祇
憑野老哭回天死生親見收京日今古同悲出塞篇滿地
江湖問歸路百花潭水夢無邊

太白酒樓

雲中攜到驚人句，千載風流第一樓。白日長安全在眼，青
天蜀道獨昂頭。後來狂客才誰敵，生不同時我獨愁。當世
騎鯨仙再返，洛陽無路問糟邱。

過管敬伯司馬大梁

奇才一表動長安，更走邊關氣鬱盤。百戰餘勛付奴輩，中
興大筆出衙官。沙驅地轉河聲疾，日射天孤塔影寒。自古
中州雲物盛，與君同上吹臺看。

陳作霖字雨生號伯雨晚號可園江甯人光緒乙亥舉
人就職教諭有可園壽藻堂等集

詩話可園研精經史留心鄉邦文物著述甚夥江甯
文學自汪悔翁後允推碩果其詩如周忠毅公墨蹟
新樂府楚南館行庚辰秋日雜感關外嶺表滬上等
篇皆忠厚惻怛有功於世道人心性好事山水淡於榮
利晚歲失明猶口授兒子輩吟哦不輟其孤懷高志
往往見於篇章感事憂時清而不激出入於杜韓白

陸而不襲其貌晚年
喜學山谷不流褊仄

放歌

寒風颯颯吹屋破明星挂檐如月大
中夜憂思不能卧披衣獨起挑鐙坐
丈夫豈合常窮餓牢落風塵偏軼軻
踟躕地愁無那愁無那心忉忉夜欲曙
雞三號拔劍斫地歌聲高

走雖不能及奔馬力雖不能挽強弓
平生揣摩五千卷略則黃石韜太公料
天下事屢奇中視賊伎倆掌上同儻使
參謀向唯幄未必不成分寸功況兼一
枝琳琅筆飛書草檄頗自雄豈若談空
說有輩只合束之高閣中茫茫宇宙無
知己仰天吐氣成白虹側聞江淮諸元
戎延攬似有名將風我欲杖策相追從
短後袴褶騎黃驄軍門長揖誰爲

通

水涌必由泉源注木茂必由根本固我家百口渺何處吳
越晉秦各異路吳越烽煙高接天死生消息都茫然晉秦
山川復險峻脂車秣馬愁難進每一念之心煩慙安得聚
居安樂鄉土地膏腴田畝良種以黍稷雜稻粱上爲祖宗
供烝嘗下爲宗族給衣糧其餘親友來我旁盡情施予慨
以慷不愁揮盡黃金黃嗚呼此願何時償

讀書不能救奇窮旁人勸我學老農識字不能免愁苦旁
人勸我學良賈秉耒不知耘與耕握算不知虧與盈學農
學賈皆無成如此迂腐君莫笑富貴從來難逆料力田農
雖可爲水旱畢竟隨天時居奇賈雖可作慢藏亦恐遭奇
禍不如潛心經濟與文章始則困兮終則昌

丁丑正月贈劉恭甫卽以留別

六經厄秦火漢儒勤考稽司農集大成胸次無町畦後人
訓詁學於茲得階梯君家富經術世業承青藜逮子復博
洽箋疏窮端倪染翰爲文章筆力追昌黎餘事及詩賦擺
脫尋常蹊鸞皇發清嘯不作寒蛩唳我初識子時介紹由
璜溪姜君龍門同御李小湖一見深交締每當肄業頃扃門

發新題儉腹無可搜音屢誤雌覓賴子行祕書三篋指我
迷行隨千里足駑馬亦馱馱名高旁人妒往往俱遭詆豈
無賞識者刮目資金篋邑志重纂修局開鷺坊西金沙井一名白

鷺坊子首應徵聘筆硯隨身齋盥竽更及我左右勞挈提體
例互參酌嘉味調鹽醢疵類互抉摘良藥進刀圭梅翁汪丈

今作家燭理如然犀謂我大事記與子藝文齊泰山高且

峻肯爲培塿低既慚復以幸黽勉事攀躋況此十年中佳
日常招攜挑菜莫愁樹采菱元武隄飛霞及靈谷窮探仙
佛樓觴詠樂復樂唱和賦藿兮他時尋爪印歷歷皆鴻泥
陽和催淑景雪釋冰流澌計偕期在邇門外車駕輓行當
與子別一曲聽歌驪功名亦何物得失爭蟲雞感子纏綿
意酒酌金玻璃祝我赴長安春風健馬蹏自分骨相寒不
稱居金閨江南夏四月芳草碧以萋會當返故里暫離非
久睽遊覽與著述願子其少俟

周忠毅公

宗建

墨蹟卷送藏焦山詩爲趙季梅中翰

彥脩

作

我昔泛棹游焦山曾見楊公

一清

所遺之玉帶文囊謀略

海內傳能除逆瑾功尤大又嘗驅車上春明得向椒山楊

公繼盛

祠堂親展拜平生膽不借蟒蛇尙留諫草壁間發
光怪勝朝氣節無與儔正嘉諸臣通沆瀣下逮天啟昏亂
朝西臺審諤洵爲最御史周公鐵作肝立朝慷慨稱匪懈
對仗彈章劾廠公不憚五虎十彪逞毒害朝歸鄉里暮園
扉擊佞未成甘首碎遺文零落不可知儻獲縑緗生敬愛
吳江地僻公故鄉梅叟來居學官廨耆文好古擅風雅休
沐餘閒閱書畫賈人不識公手書捆束牛腰市中賣百錢
買得喜欲顛細字聯珠大編貝裝池釐訂具苦心伏暑闌
時勤瞭曬移官攜向金陵來篋笥深藏防破壞因思名臣
墨蹟以人重片紙俱堪閱時代何況草書神妙走龍蛇居
然爭坐位帖同一派天留神物不敢私廣大流傳推法界
何妨施向枯木堂解脫因緣兩無礙徧徵題詠爲證盟欲

令海天佛國添佳話永嘉方伯本通儒

孫琴西先生衣言

護法宰

官擁冠蓋巧偷豪奪防未然印鈴朱紐篆垂蕤從茲人勝坊間定慧寺常同楊公玉帶山門挂我今對此轉躊躕緝素多年無不敗何當鐫石嵌壁間得與松筠菴中諫草之堂遙作配

胭脂井弔張麗華

春江花月南朝冷牀下軍書報邊警狎客歡筵未及終鏡明照徹山河影臺城古井苔花紅臨春結綺樓皆空君王妃子甘同夢塵飛不到潛龍宮國亡難備牽羊禮碧血凝膏誰爲洗美人至竟不負君未共宣華入晉邸

春夜寒甚懷鳳生

三月將半春未歸海棠凍僵紅不肥滿天密雲慳作雨朔

風料峭寒砭肌此時攤書擁裘坐微吟肯輟鐙前課漏滴
銅壺宵已深淡月窺簾趁窗破北鄉飛鴻逐去塵誰憐懷
遠意逡巡深居斗室猶嫌冷况爾風檐對策人

可園對雨

新晴無幾時東風又作雨清明節已過春色在何許搖綠
竹相戛溼紅花欲吐胡蝶弱還飛流鶯澀亦語造化暗推
移峭寒會莫阻不息卽天機吾悟養生主

鴛鴦湖邊望煙雨樓

風起鴛鴦湖上秋臨流欲渡苦無舟我來竟未逢煙雨紅
出斜陽畫裏樓

感述做涪翁體

少時好博情不專晚年學道忘蹠筌日長掩書不復讀森

然萬象來我前後生問我何宗旨笑而不答坐隱几秋深
聞得木樨香乃知吾無隱乎爾

我今衰朽百無用一枝老筆猶飛動建康嘉瑞頌赤烏太
玄終篇吐白鳳尚憶嬉游科舉場後來聲望重江鄉他時
人儻傳遺藁莫誤虞山拂水莊

蔣芎字耐棠宜興人光緒乙亥舉人官丹徒教諭有醉
園詩存

搖落

搖落天涯暮羈棲感不勝無家遂耕隱有婦作吟朋多病
風懷減悲秋客思增吾生安守拙與世敢模稜

舊業荒三徑巖親滯一官十年遭喪亂萬狀忍飢寒作客
會何補依人總覺難愁多怯霜鬢引鏡幾回看

蔣師軾字幼瞻上元人光緒乙亥舉人有三徑草堂詩

鈔

詩話幼瞻少負英氣已而深自斂退究心關閩之學故鮮過舉橐筆遠游與弟紹由並負時名稱金陵二蔣詩秀而冷如寒花初胎偃蹇冰雪惜年不永末尤所至

秋夕

木末秋雲飛晚霞不成霽涼風動虛幌雜卉媚幽砌坐對日西匿遙空但陰翳向夕蛩聲來秋心忽滿地焚膏手殘帙萬籟感情思羨他鄰婦織已爲歲寒計

秋晴游妙相庵同周二守卿

憲會

周大鳳笙

鼎彝

筱

園紹由弟

生公性疏曠相與坐忘機水木通禪意煙雲浸客衣清談聽落葉散步入林霏爲問隨園勝蒼山夕照微

四壁薜花滋清華壁上詩可憐湘水恨如誦楚騷詞泉石
宜清供蘭蓀託遠思高風安可仰庭木蔚寒姿

曉過揚州

潮聲風力一帆適午夜霜花冷舵樓幽夢初醒江海曙人
攜殘月到揚州

立秋夕

今夜三更月梧桐一葉秋舉幃望河漢清影下西樓蛩語
爾何意露華涼不收驚心歲華晚風色動吳鉤

奔牛雨泊

雲波瑟瑟夜迢迢偈仄篷窗酒力消短笛聲中風又雨殘
燈和夢落寒潮

絕句

茅茨俯流水寒篠搖煙霏牧篋下前徑一雙魚翠飛

吳塔夜發

三更月滿船載夢溯前浦天水夜寥寂微風數聲舫塵事
忽蕭然秋心入蟲語

送汪寶素之武昌

漢廣通三湘蘭芷多於草春風一以至舒華媚清曉遙遙
屈宋豔落英嗟已槁願君舉孤芳纏綿發天藻相逢江上
人遺之寄東道

朱貽泰字后成號少卿寶山人光緒乙亥舉人有秋濤
閣吟草

登吳山

簇簇芙蓉雨後青峰危嶂疊闕瓏玲人來絕頂消塵夢晴

送虛嵐作畫屏雪恨萬層搖石壁琳宮干佛鎮山靈振衣
直欲凌雲去野鶴盤空健拂翎

張仁黼字劭予固始人光緒丙子進士改庶吉士授編

修官至吏部侍郎

詩話劭予久直上書房歷官吏學兵工諸部侍郎以
氣節稱指摘津要無所顧忌而愛才下士出於至誠
人有片長譽之不去口性至孝奉太夫人諱以毀卒
於家江書法精鑒藏詩不輕作偶一爲之意真詞雅
饒有清音

胡寅谷內弟善飲贈以酒券以詩見報卽和原韻

東京擅風節俊及與願廚降而畢阮輩爛醉卧酒壚文藻
奚足貴彩禽尾畢逋爾我道義洽促膝愛蘧廬高譚揖管
葛論文薄三蘇精研治民術平衡披王符嬉今而罵古腐
儒有何辜華顛媠如昨霜雪灑頭顱君方謝秉鐸我久滯

癡壺君文涵萬有我智辨之無性只分狂獯才亦判腴枯
君撫宓子琴我啖樂正舖我歌君且舞軒乎其鬻乎楚些
慨以慷如豨和噫惡

發介休縣過義棠宿靈石途中卽事

古鎮義棠過故關冷泉摩兩山爭壁立湍悍夾汾河
松檉蔚青蔥山花灑嶺紅梯田綠萬頃灌溉一渠通
冠爵通津古谷寒雀鼠空前山絕頂處危塔矗雲中
野舟不繫纜疏柳覆清津穴處人家慣宛然葛天民
急湍齧頽岸峭壁亘寒雲徑仄予懷坦王尊志不紛
靈石浮水上扣之出金聲蟲篆誰能識蒼茫弔古情

感事述懷步漫堂韻

孔哺請看檝上鴉蕭然兩鬢雪霜加展書心似盈蹊草作

字瞳如隔鏡花身世冥冥紛去雁官私苦苦辨鳴蛙閒窗
搓手渾忙甚不是詩筒是畫叉

顧璜字漁溪祥符人光緒丙子進士改庶吉士歷官通

政使改鑲白旗漢軍副都統

詩話漁溪自詞館改戶曹傑面樞廷游陟卿貳新官
制行以通政使改授副都統先世本崑山徙江甯其
尊人展卿先生以佐幕出游遂家於泚漁
溪始改籍登第多授甲乙科蔚然爲右族

至蘇門山下百泉靜樂園

歲歲鄉園慚闊別今朝舊地訪蘇門四圍山色松邊路百
道泉聲竹裏村勝會廚剛薦櫻筍豐年社喜足雞豚嗟予
又逐紅塵去安得坡翁釣石溫

游石屋洞

筍輿度城陰池邇南屏麓村溪時映帶陂陀半起伏遠翠

九里松濃碧萬竿竹梯雲捷飛猱登頓輿夫熟危磴紅泉
瀉泠泠奏笙筑異境忽天開高洞得石屋狀若敞軒檻筵
任肆水陸環壁鏤羅漢數五百十六巍然坐釋迦諸佛周
其足旁列石枰枕朝暮閒雲宿神工與鬼斧驅使殆阿育
兩窟尤深邃欲控終瑟縮冰樓寒鑿齒浮螺字橫讀後洞
深復深異產飛白蝠大仁寺猶在齊樹樓誰築杖藜一舒
嘯俗塵吐幾斛錦屏疊環抱繡嶺互迴複芳鮮積階平仙
風吹謾謾似有鸞鳳音佳人老空谷流連甯忍去將行更
返矚歸路下蒼煙湖光蕩新綠

高賡恩字曦亭甯河人光緒丙子進士改庶吉士授編
修歷官太常寺卿諡文通有思貽堂詩集

詩話曦亭講學服膺宋儒居館職時爲徐蕙軒相國
崇文山尚書所重迴翔禁近觀察漢南以薦內召入

直承華宮授大阿哥讀庚子後引退主閣中講席
以終集中有承華宮紀事詩十五首可備掌故
何潤夫招集雲山別墅次韻

九陌塵囂此境閒樓臺圖畫勝荆關日邊金掌明華表雪
後白頭逢遠山天近吾曹試一問春寒高處不勝攀暮鴉
殘照催歸客青瑣來朝點舊班

辛丑春乞身東歸過太原贈張愚生

細草青回輦路春舞雩今見詠歸人寒燈夜話西山雨匹
馬朝飛朔陌塵海內論交幾師友秦中播越舊君臣丈夫
不爲窮途哭萬感蒼涼淚滿巾

擬宮人入道詩

然鐙繡佛衣偶製萬年字停針夢九霄枕上銅駝淚
紫霄朝玉眞花龕薦荃蕙爲感昭陽恩鑑香祝千歲

龐鴻文字綱堂常熟人光緒丙子進士改庶吉士授編
修歷官通政司副使

江亭春望

觚棱佳氣捧雲來輝映昭王舊日臺
黍谷幾吹鄒律順析津頻泛漢槎
迴山連榆塞形原壯水咽桑乾
陳未開爲望薊門煙樹裏此中應有棟梁才

題張雨生樵黃小松坡公石銚圖

小聚城南尺五天六街臘鼓又催年
一甌苦茗饒鄉味却憶家山玉蟹泉
肯向盧溝策蹇無龍潭佳處擬蓬壺
歇心亭上烹茶坐好寫奇峯散綺圖

黃滌之字杭蓀善化人光緒丙子進士官吏部主事有

貞復堂集

春日聞雁 在新莊作

纔見南飛又北飛，征途萬里影依依。
斜陽滿地人何處，芳草連天汝獨歸。
楊柳春風聲下上，梧桐秋雨夢依稀。
雪泥舊事渾如昨，回首前塵迹已非。

陶銳字辛垣黃岡人光緒丙子進士官吏部主事有玉香齋詩草

鷹山

連山姿飛騰萬狀紛羅萃，其中踞蒼鷹森然欲離地。
石骨露細筋峯銜磨利翅，狐兔失窟穴鳩鵲凜然退。
我來及早春颯颯高秋氣，亂流走白沙寒草少青翠。
側足不敢捫摘，縑疑可試化工妙。寫生肖物神，竅備輿圖考。
未詳支筇聊

適意他時風雨來毋令鞢脫臂

紫雲宮題壁

水落灘聲走怒雷僧樓門面峽江開山雲忽起天乍暝一
十二峯飛雨來

江上

秋雨秋風客棹遲放船好趁晚晴時青山斷處見僧寺紅
樹叢中出酒旗刈稻人歸攜穉稈賣魚船去載鷓鴣明霞
點綴澄江景欲和當年小謝詩

聞福增字眉川號退庵太倉人光緒丙子進士改庶吉
士授慶符知縣有退庵詩藁

臨江寺

臨江古寺接層穹浩蕩川原入望空驛路高懸飛鳥外濤

聲直走亂山中人生到處鳩留雪我意渾如鶴退風羸馬
做裘游欲倦一鞭回指海雲紅

葛之覃字子周南皮人光緒丙子進士官高密知縣有
種蕉聽雨軒詩鈔

秋夕後園散步

閒階新雨霽小坐掃莓苔花影月扶出雁聲風勒回溼薪
雙犬藉枯葉一螢俛到此成幽賞孤吟孰與陪

劉曾騷字驥臣祥符人光緒丙子進士官荏平知縣有

夢園詩集

七月二十九日得秦中趙岳生司馬鑄書知女弟于

去歲四月朔日殂謝詩以哭之

離家一別十年餘噩耗傳來淚襲裾謝女空留殘雪詠鮑

兄偏少大雷書真成踽踽孤行客尙想亭亭問字初孰使
才人悲遠嫁秦關西望雁行疏

十一月二十八日移入任城夢園是日爲王宜人忌
日感而有作

辛苦買山錢山居亦自憐大招曾此夕小別動經年翠被
生寒夜麻衣掃雪天蘆簾兼紙閣燈燼不成眠

章邱清明

東風吹暎一身輕人似浮雲自在行好是綠楊紅杏裏女
郎山下過清明

晚晴簃詩匯卷一百七十終